

# OLA

PULETINI A'OGA



20 MATI 2023 ~ Lomiga 2 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

## SAUNI ATU FAGASA I LANA FONOTAGA 2023

Ua atofa le aso ma le nofoaga mo le faamoemoe o le faalapopotoga, o Aperila aso 11, 12 ma le 13, i le aai o Otepoti Tanetini e fia faataunuu ai.



O le ulua'i fono tele lenei a le FAGASA, talu ona faalavefau le Koviti-19 ma faapea ona taofia ai ana fuafuaga masani.

O le fono faaletausaga o se tasi o ana galuega autu e pei o lana tu masani, ma o lea ua tonu ai i le laulaufono e faataunuu loa, o lea ua maua le laolao.

O le manulauti o le fono, Mitamita i lau gagana. Maua'a i lou faasinomaga.

Saunua le peresitene aoao, Faatili Iosua Esera (ata), o lenei autu o loo tulituliloa ai pea le faamanatu tauave a le faalapopotoga: o le gagana ma le faasinomaga o poutu ia i le tapenaga o fanau e avea o ni avefeau lelei mo le leo Samoa ma lona faaualoaina.

Ua sauni mai lona lala i Tanetini e talimalo i le faamoemoe, ma o se avanoa taua e toe feiloa'i ai ona sui ua loa aso o valavala, saunua Faatili.

O le a feagai le faalapopotoga ma ana pisinisi masani ai i fonotaga faapea, e aofia ai faasoa mai tootoo aami, o pepa ma galuega fetufa'i a i latou ua filifilia. O le a alo atu foi ona sui i le sailiga o ni e tauavea tofiga ta'ita'i mo le aga i luma. Manatua, Aperila aso 11-13 i le taulaga o Otepoti Tanetini.



**TEINE NIUE MCAULEY SILI O LE 2023:** E toe faamanatu mai la'ei i taimi o misionare ma le tiputa. E le tioa lona aveina o le malo ona o le ese mai foi o i latou mai isi. O loo atagia foi i la'ei teuga lauvao a tua'a anamua ia latou faafiafiaga. E ta'u mai foi i le tu le tulaga e fia ausia, o le sili. Lea na ausia lava.

## Tautua fou A'oga Samoa Online



UA ofoina nei se tautua fou mo a'oga i le igoa A'oga Samoa Online. O le aso 3 o Aperila 2023 e amata ai lana tautua.

O lenei faama'ite o se tali atu i mana'oga o fanau a'oga Samoa o loo fia maua se fesoasoani faaopoopo i a latou meaa'oga, e aofia ai le a'oina o le gagana Samoa ma le faa-Peretania foi.

Sa faamalosia le faama'ite i le talanoa mai o ni matua, aemaise i le taimi na lofia ai le lalolagi i le faama'i Koviti-19. E to'atele fanau na le toe o i le a'oga ma tula'i mai ai sea mana'oga mo ni a'oga i luga o le laina (online).

Sa faailoa foi sea mana'oga e nisi o faia'oga ma fanau a'oga e lagolagoina se fesoasoani faapea, saunua Pauline, o se tasi o faatonu o le galuega.

O le A'oga Samoa Online e lima ni sini autu ua taula'i i ai lana tautua.

1. e lagolago polokalame o a'oga i gagana e lua
2. e lagolago fanau e ala i su'ega lelei tapena;
3. e fesoasoani e ala i su'esu'ega;
4. e lagolago fanau e ala i alaga'oa ua lelei saunia;
5. e faafaigofie le fetufa'iga o faamatalaga i le va o gagana e lua—Samoa ma le faa-Peretania.

E aofia uma vasega o le matafaioi i le tautua, mai le tulagalua e aulia le iunivesite.

E maua ni faamatalaga faaopoopo i luga o le upega o le a avea ma taulaga o fesoota'iga: [www.aogasamoaoonline.com](http://www.aogasamoaoonline.com) Ua avanoa nei mo le asiasi atu i ai, ae faato'a amata aloa'ia ia Aperila aso 3, 2023. E to'afa ni faia'oga ua ofoina o latou taimi ma tomai e molia ai le tautua.

**Asiasi fo'i i le tatou upega [ola888.com](http://ola888.com) mo se fa'aopoopoga i lau faitau.**

RIPOTI A'OGA: SAILI AUKUSO

## Mana'omia pea le tautua a le Polyfest mo le Pasefika ma Aotearoa



O le aso na loma o le faamoemoe na atofa sa tini lava i lona o'oga i le nofoaga ma le taimi na tusia.

I Hagley Park i le Aso Toona'i na aofaga potopoto ai laumua a'oga mai itu eseese o Kalaisetete, auā lana Polyfest o le 2023.

Sa agalelei mai le tau i lea taeao, talanoa fiafia fo'i manu o Hagley i luga o la'au, e molimauina se vaaiga e le masani ai.

E 26 a'oga sa auai i le faamoemoe a le Polyfest Canterbury i lenei tausaga. O a'oga a alii ma na a tama'ita'i, ae faapea foi a'oga e auai uma kenera e lua. O nisi a'oga e pulea e lotu a o isi foi o a'oga a le malo ma na e tuma'oti.

E le faigata ona tauilo aga o faamoemoega faapenei, auā e gagana mai foliga fiafia o fanau uma e auai. Faamaonia mai e matua sa fesiligia i se lumana'i o le Polyfest i le aai o togala'au.

O le tina ia Toleafoa Malu Tulia, o se tausii soifua, sa faailoa lona talitonu maumaua'i i le iai o se lumana'i o le Polyfest, e le gata i lenei aai a o Aotearoa uma.

"E taua tele le faasinomaga i le ola maloloina o fanau. Aemaise lava o le nonofo ai i atunuu e le tasi se faasinomaga. O le Polyfest o se taulaga o vaaiga mo fanau, e faamanatu pea ia i latou o latou faasinomaga," saunoa Toleafoa.

E faapena foi se taofi o le alii faia'oga, le tofa ia Lepule Leuma Gali. "E le tau faailo ala o le lupe Samoa i vao ese, auā o fea lava e ati ai lona fale, e iai foi ma ana tu ma aga faafiafia. Poo totonu o a'oga, i aiga poo fea lava, e le mafai ona natia a tatou tu masani," saunoa Lepule.

E le pine o i la'ua e fai ma sui o le faitau selau matua sa auai e lagolagoina le faamoemoe. E faapena fo'i se lagona o le fanau sa faisao i le aso. E iai le alii o Tumamā Tulia, tama a'oga a St Thomas, e atoatoa lona taofi, e mana'omia e Niu Sila le Polyfest Pasefika.



Seth Taleni, la'ei le matavaai, ma se vaega o lana 'aufaafiafia. O lana toe Polyfest lenei ma sauni atu ai mo le isi laasaga o le taumafai.



Tumamā Tulia ma lana uo mai St Thomas, ua le māua lona suafa, faletua ia Toleafoa Malu Tulia, ma le tofa ia Lepule Leuma Gali

E taua galuega fa'aauau. "E manaia le tilotilo atu o loo fa'aauau pea le sao o tama ma teine a'oga tuai, o se faailoga lelei lea," saunoa Toleafoa.

O le vaiaso na se'i sola atu na tamua ai Aukilani, lea foi na molimauina i alaata, leitio ma nusipepa. E silia i se 60,000 i latou na molimauina. O loo fa'aopoopoina pea a'oga e auai, ae faapea foi malae.

E iai le a'oga a Timaru o lo latou tausaga muamua

lenei. I Aukilani, o loo fa'aopoopo pea a'oga ma malae. E iai lenei o Tahiti ma Hawaii e fou mai. Ae 'aue ne'i galo foi le taua mo fanau faato'a ulufale i le tauvaga.

I le aotelega o taofi, e tasi le faafitiga e iai le sao aogā o le Polyfest i le ola maloloina o fanau i Aotearoa. Ma e tataua ona ave i ai le lagolago atoa a le atunuu, ma se faatupega mai le malo.



A'oga a Tama Sagato Tomasi i Kalaisetete. Tele ni itu aogā o le Polyfest i le tausaga o le va o fanau e eseese aganuu, ua mafai ona siva le tama palagi i le siva Samoa, o se faailoga lelei lea.

TALA A'OGA NIU SILA:

## Savalia le ala e faia'oga faailoa o latou mana'oga tautotogi

NA FAATINI lava le folafolaga a faia'oga NZEI e savalia le ala se'i faailoa o latou mana'oga tautotogi. Auai faatasi ma uso a faia'oga o le kolisi, e tusa ma se 60,000 le aofa'i o sui na auai i le faamoemoe.

O le Aso Tofi ua mavae na faatino ai lenei i le taulaga o Aukilani, Kalaiesetete, ma Ueligitone. Na latou savalia alatetele ma magaala, e momoli le fe'au i le malo. Sa aufaatasi ai ma se vasega o faia'oga o A'oga Amata.

Na suia le vaaiga i lea taeao, i le fetuleni atu o sui ma faatumulia ai autafa ala, ma auala a le malo, ma a latou laupapa ma ie faailo o fe'au, e ta'utino le tulaga o le faasoa utiuti i tupe o loo latou maua. O le tasi laupapa e iai le upu, Ua le mafai ona totogi o matou fale.

O se tasi lenei savali tete'e aupito to'atele ua faia e se iuni, saunoa le peresitene o le NZEI. Ae na faaopoopo se faia'oga, o lenei pa'au mai o se fe'au malosi o le le fiafia o le to'atele i le tulaga o loo taatia ai le mataupu.

I Ueligitone na laasia lumafale o le palemene ma feiloa'i ai le solo ma le minisita o a'oga, Jan Tinetti, o ia foi sa pulea'oga ma o se faia'oga mo ni tausaga se tele. Na ta'utino i le le faigofie ona fesaga'i ma le mamalu o faia'oga, pe a manatu o



E le falala fua le niu e pei o le upu; e le savali fua ona o le fia savali, e savali ona o se mafua'aga tatau. Ata Phil Water/Getty Images.

ia foi sa pito i luma i finauga a faia'oga ma le malo i o latou totogi i na fatia. Ae na ia folafola le mea e gata ai lona mafai, e saili se tali aupito lelei i le fanoga o faia'oga.

A o taumafai atu le minisita e asu malu i pu'ega ma tala lana faiā i mafatiaga o faia'oga, ae na tali mai i le valaau, 'Walk the Talk.'

I le iuga o le aso, e leai se tali mautinoa mai le malo ae o loo tatala pea le faitoto'a o le minisita e faaauu talanoaga mo se maliega autasi.

E le na o taulaga tetele ae faapea foi tama'i taulaga sa auai uma. I Tauranga e silia i se 2000 faia'oga sa faapotopoto i le moa o le taulaga.

E le faigofie mo matua aemaise e faigaluega, faapi-toa Aukilani o loo feagai aiga ma mafatiaga ona o lologa na se'i tuana'i.

Ua iloa le fili ulua i le faafitauli o le sii mauuluga o le tau o oloa. E 7.5 pasene o loo taoto ai le mauuluga, a o aga'i ina mau le tamaoaiga o le atunuu, ma ua le gaoioi ai lona atina'e lautele, o se popolega lea.

## Mana'omia se faaleleiga atili i le tulaga o le va fetausia'i o fanau

Fai mai se ripoti a le ERO e tasi mai le lima tamaiti e le o ni papalagi e feagai ma faafitauli o aga faailogalanu i totonu o a'oga. Na fautuaina foi e le ripoti le mana'omia ona faia o ni suiga 'anoa e tali atu ai i le faafitauli.

O le su'esu'ega sa faatonu e le ERO, e fia iloa pe o faapefea le tulaga o le va nonofo o fanau e eseese aganuu. O le fe'au o loo molia pea lava pea e ala i fautuaga ma tuualalo, ina ia ausia e Niu Sila le tulaga o se malo e atagia ai le matua i lea tulaga.

I lenei su'esu'ega ua fa'aalia ai ni popolega, ina ua manino le ata, o loo iai pea se galuega e fia faia.

O le faailogaese o nisi tamaiti e isi tamaiti e lavelave mafua'aga. Ae malosi lena amio pe afai e ese le lanu o le pa'u pe faapea foi, e iloga faaese i latou na e le o le lanu pa'epa'e. E o faatasi lena faiga ma foliga vaaia i la'ei ma teuga e iloa ai se aganuu a se tama ma se teine. O i latou na e faatitino i ai faiga a le 'aufaataluā. Ta'utino foi isi i le faaese o i latou ona e atamamai ma iloga ausiga i lo le to'atele.

O molimau a i latou nei e foliga e lagolago ai ni mau e iai o nei:

1. E le popole tele a'oga i lenei faafitauli. E iai ni mataupu tuua o le fa'aaauu pea o amioga saua a ua uma ona ta'u i le faia'oga, ma le pulega.



E le a'afia tele fanau e auai i a'oga faapitoa e faataua ai a latou aganuu, aemaise i le tapulaa tauafua e moomia se si'osi'omaga malutia.

2. E tupu se lagona i fanau mafatia e le o se nofoaga lea mo latou; e avea lea ma faalavelave i se olaga fiafia i totonu o nisi lotoa a'oga.

3. E malosi le lagona o le lē faaouoaina ma le tu'ua to'atasi tainane e lotolotoi i le va o isi tamaiti.

Sa ta'ua i le ripoti le tulaga fai a'e o le numera o fanau e le o ni papalagi o le a nofoia potua'oga a Niu Sila i le 2043. Faata'ita'iga, o le a siitia i le 43 pasene le numera o fanau Asia e a'o'oga i lea taimi i potua'oga a Aukilani.

E faapena foi mo fanau Pasefika ma Initia o loo alala aiga i Aukilani. Lona uiga o le a iloga ni suiga i le va nonofo o fanau pe a aulia atu lea taimi.

Ae i lenei lava taimi e fia maua ni tali vave i mafatiaga o nisi o fanau.

Sa ta'ua foi i le ripoti le uiga faali o se vaega o faia'oga, sa ta'utino lo latou lē matuā lototetele pe a fesaga'i ma fanau o faiganuu e ese mai. O loo iai foi a'oga e le o tausisia faiga faavae a le Matagaluega, e ui ina manino lenei i le ta'iala aoao a le malo.

TALA A'OGA NIU SILA:

## Laga e se tama'ita'i su'esu'e le mataupu i konekarate taua'oga

O se faaopoopoga leni o le tala i le ripoti a le tama'ita'i o Michelle Duff ma lana su'esu'ega i le tulaga o A'oga Amata i Niu Sila.

Sa ta'ua i le tatou lomiga talu ai le vao fa'aaliga a Michelle, i le mae'a ai o lana sailiga, ma faatula'i mai ai lana fesili, Pe aisea ua faataga ai le fa'aoga o fanau iti e fai ai pisinisi a ni pulega e saili polofiti o latou sini?

Na tuua'iina e Michelle ni kamupani i le tulaga mafatia o loo iai a'oga amata a le atunuu. E talitonu Michelle o loo faumalo ni pulega se fa. O lana finau, e le o se mea amiotonu lea. O lana faaiuga fo'i, ua mafua le le taliina o mana'oga o le tele o tamaiti, ona o leni faumalo a ni pulega se fa. Na ia ta'ua leni o se taaloga [faaKapitalisi].

O le tama'ita'i o Duff sa feagai ma se su'esu'ega e asia ai tulimanu o le atunuu, sa siligia foi faia'oga ma taiulu o pulega, ma tilofia foi laupepa o ripoti ma faamaumauga, e iai ona taunuu i lana faaiuga.

Muamua, e fa pulega o loo faasoaina se vaega tele o le \$2.3 piona mai le malo mo le atina'e o a'oga amata. Ae a fua i le tulaga o mea e tua i ai fanau ma faia'oga, e le o atagia ai sea tufatufaga maoa'e, molimau Duff. E ta'u mai i foliga o nisi ofaga le mea moni. E molimau foi faia'oga lava ia i le tulaga o le galuega. E le lava faia'oga pasi, e mafua ai ona fa'aoga i latou e itiiti pe leai ni tomali i le faiva.



E tasi le fe'au malosi o loo taumafai Duff e ta'u mai, e le o lelei le faasoasoina o tupe mo fanau iti, ae mea ane e faitau pilliona le paketi.

E le lava totogi, talu ai e faasoa totogi e pulega o loo ave i ai tupe, e pule lava latou i le faasoaga. O le iuga, e feoloolo se vaega ua faamavae, o isi ua saili ni galuega e lua a'i ona e le lava le totogi e tasi.

Sa ta'ua foi le taugata o pili e totogi atu e matua i nei lava pulega e fa. Ua mafua ai ona faaluafesasi filifiliga a nisi matua i le avatua o fanau i a'oga e lata ane.



Michelle Duff

O le fautuaga a Michelle Duff, ua tatau ona toe tilotilo le malo i lea tulaga. O se vaega tupe tele leni o loo avatu mo A'oga Amata, ae a taga'i i fua o le fa'aogaina, e le feauga.

E fesiligia ai faiga faavae a se malo i galuega tauofo, le mana'omia o se faiga e maopoopo lelei, e taofia ai le fa'aoga faaletatau e nisi pisinisi o tupe a le atunuu.

Saunoa se tina faia'oga amata, e le tatau ona tuuavanao le malo i ni faiga faapea, aemaise o loo talanoa i le lumana'i o se malo, o ana fanau.

## Sauni e tulei le suiga fou (Equity Index) mai le tesile na sau ai

O loo liuliu malie le faatinoga o le fuafuaga a le malo i se tasi o suiga iloga i le faatupega o a'oga.

E pei ona matauina ia tatou ripoti ua mavae, o leni faamoemoe o le malo o le a iloga ona suia ai le alafua na sau ai i le faiga faatesile (decile system).

O le faatesile ua iloa i le sone o le fanua poo se vaiaai ma le tamaoaiga o aiga e nonofo ai. Afai e mafuli le pasene i aiga e maua tupe maua, o lena foi e fua i ai le vaegatupe e maua e a'oga o loo iai i lea sone. Afai foi e mafuli i aiga e maua tupe maua, e atagia fo'i lena i le faasoa a le malo.

Peita'i ane ua matauina ni to'atuga i lea faiga, na mafua ai ona faama'ite se faiga fou, e tali atu ai le malo i mana'oga o fanau ta'ito'atasi, nai lo le taaofa'i e pei ona sau a'i. I sea faiga o le a avatu tonu ai le fesoasoani i le tamaitiiti o loo sili le mana'omia o le fesoasoani.

Fai mai nisi, sa maua faia'oga o a'oga i le faiga tuai, auā e tasi a le fua e fua uma ai. Sa maua ai nai faasiliga mo nisi fuafuaga, peita'i i le faiga fou, o le a fua lava le ofu i le tino o le tamaitiiti e to'atasi.

I le fa'aaliga a le Matagaluega i le Equity Index i luga o lana upega, o loo faamamafa ai le tulaga lē ausia o tapulaa e fanau Maori, Pasefika ma isi, i lalo o le faiga tuai. Na mafua ai le faaiuga, ua mana'omia se faiga fou e sui ai.



O se alii pule ma tamaiti o lana a'oga, e lavea i le vasega o le Tesile 1 poo latou e mativa i tupe ae taumasuasua le mauoloa i le lotofiafia.

O leni la suiga o le a iloga se aafiaga i fuafuaga tauseleni a le tele o a'oga a le atunuu. E 2000 ma ona tupu a'oga o le a manuia i le faasoaina o le \$130 miliona, o loo iai ni faasiliga mo le to'atele e faatusatusa i le fua tuai. Ae le faapena mo isi a'oga sa manuia i le faiga tuai, e aofia ai se iva a'oga o le a toese le \$100,000 sa masani ona maua i le fua tuai.

Ua ta'ua le Equity Index (EQI) o se meafaigaluega e ta'iala ai le fe'au a le matagaluega, i le lufilufia o tupe faaopoopo ma alaga'oa i a'oga. I le EQI, e auiliili le tulaga o le mafai ma le le mafai. Mo se faata'ita'iga, afai o matua e lelei a'oga, o lona uiga o

loo iai le mafai e fesoasoani ai i le fanau. Afai foi e itiiti pe leai, e faapena foi ona fua le faasoa ia fetau lelei i mana'oga o i latou. Sa ta'ua foi le suiga o se mea lelei talu ai le ila ua iloa faatasi ma le faiga tuai, e faapipii ai le upu 'mativa' i nisi fanau ma faese ai i latou.

E 463 le evalesi aoao (national average). O itumalo e maua tupe maua a'e numera o na foi e tatau ona taula'i i ai le faasoa. E talitonu le matagaluega o se faiga lelei lea, e ave tonu ai le faamua i le aiga ma le tamaitiiti.

O le EQI e le fuaina ai le atamai ae tau o mana'oga. Ae manatua foi, e iai le sootaga malosi o ausiga lelei i le atamai ma le faasoa tutusa tauseleni.

*Faasoa o le Vaiaso:*

## Tiute ma le faatauaina e o faatasi

O le fesili pe iai se fua e fua ai le taua o lea faiva mai le isi faiva, e leai sona tali manino. E mafua lea auā e eseese uma faiva; e tofu ma ni tomiai faapitoa e faatino ai; ae i le iuga o le aso, e filifili le tagata i le faiva o iai le faatauaina. Auā o le faiva lena e iai ma le taui lelei e soaina, i nei aso.

Ina ua faatu le fesili i se tasi vasega poo le fea galuega e moomia: o le ao o le malo poo le faia'oga, na tali se tama, o le ao o le malo. E leaga le faia'oga e tiga ai le ulu, ae lelei le ao e tele taimi avanoa e malolo ai toe lelei le totogi.

E foliga ua tula'i mai se tulaga, e ave ai le upu 'ta'uaogaina' i nisi faiva, a o isi e ave i ai le 'faatauaina.' O le tulaga lea mo le faiva faia'oga, e ta'uaogaina ae le faatauaina. E foliga foi o le fua lena o loo ua fuaina ai totogi a le lalolagi i nei tupulaga.

I le lalolagi o taaloga e maua i ai se ata manino. O nisi tama ta'a'alo e faitau miliona ua totogi ai e pisinisi e lagolagoina. Ae i nisi taaloga e ofo fua le malosia ma taimi o isi e faamaopopo ai, ae tainane e sili ona aoga nei taaloga mo le faaleleia o mafutaga a tupulaga o le lalolagi. Ua tatou iloa se vaega o le tali, e lelei mo pisinisi.

Tusa pe o le a le taaloga ae afai ua ave i ai le faatau a tagata o lena foi e opogi e pisinisi ma a latou tupe, auā e maua ai polofiti lelei mo latou.

A ua tatou iloa lava e leai se faiva e le taua, e leai se galuega e le aoga. I malo na o loo latou ave le faatau i le faiva faia'oga, o na foi o loo taulamua i ausiga mata'ina mo fanau i potua'oga.

E fiafia faiga malo e pepese i le taua o le nafa faia'oga ae e le o aliali lea i sa latou faatau e tusa i totogi. Fai mai le iuga o se su'esu'ega, e le atoa se ono tausaga o se faia'oga i le kolisi ae faamavae mai le faiva. E tele mafua'aga, ae o le tasi sa ta'ua, o le amio pulea, pe faapea foi, o le mativa o fanau a'oga i le amio lelei ma moomia. E le o se mea e tauilo lea pe a manatu i se fesaga'iga ma se vasega to'atele; tofu ma le amio mai falea'oga eseese na o mai ai, i aiga ma isi a'oga.

Upu moni, e le'i tapenaina se faia'oga e faia ni tiute se lua i se taimi e tasi. Ae le o faia'oga uma e fiu gofie; e iai e faamata ua mafai ona tauavea tiute e lua ma faia foi i se tulaga mata'ina. O nisi fanau faigata ua mafai ona liuina ma tula'i mai o ni 'tala manuia' i le amio atoa le atamai. E faafetaia le galuega a i latou o iai le onosa'i ma le faatoatoa i le vaivai o fanau. A fesili i nisi o faia'oga, latou te ta'uina le upu 'sootaga lelei'; o i latou na e faalogo ma lagona atu o latou faafitauli; e naunau e fai sina ositaulaga mo le fanau.

E silia i se tolu-kuata le aofa'i o matua Niu Sila sa tapa i se su'esu'ega lata mai, poo le a le mataupu o loo laualuga ia i latou i a'oga, na autasi i le taua o le amio pulea (discipline). I le tula'i mai o suiga o le taimi, ma le faamanaina o fanau e ala i meafaigaluega o fesoota'iga faaonaponei, ua sui ai malosia o le pule i totonu o lotoa a'oga. E le gata i a'oga a ua faapena foi ma le fale. Lenei ua oo i le tulaga ua le mafai e nisi matua ona toe faatonutonu le amio; o lea ua faamoemoe i a'oga latou te faia foi le tiute lea.

O nisi o i latou e matamata nonofo, a sese le a'oga ua vave le tusilima, a sese fanau ae tuua'i le faia'oga. E le tiao nisi faia'oga a faamavae. Ae pei ona atagia i le lafoga a le pule o se tasi tulagalua, afai ua loto matua e faasoa le avega i a'oga, e tatau foi la ona noatia matua i sea feagaiga. Afai e naunau le Malo e faalelei a'oga ma taofi faia'oga i le faiva, e tatau la ona faavae se si'osi'omaga tausaa'ia ma mautinoa, e mafai ona malu ai fanau a'oga ma faia'oga foi. Malutia foi isi fanau o loo aafia i amio a isi. Fesili i matua, aumai i latou i totonu o le talanoaga.

Ae sili ai, o le avatu o le tulaga faatauaina i le faiva. E le na o le totogi, a o le mana'oga aupito taua, o le amana'ia. E iai le manatu e mafai e le malo ona fai o lea; auā i nei aso, ua tasi lava le pule i le faatauaina o mea, o le malo. Faapefea? Amata i totogi.

E le faatusalia le ao o le malo i le faia'oga ona o upufai o malo ma faatulagaga o tofiga, ae le mafai ona faapea e le tutusa le tautiga ma le pulunaunau o loo faatino ai nei faiva e lua. Afai e taua e aogā, afai e aogā e taua. E tatau ona o faatasi le lua.

afa mata'utia, masalo a saili le ta'otoga o lagona, e ono laasia lava se 50 pasene o kiu'i e le o fiafia. Ae le ta'ua le lalolagi faa'u'ū e ala i le Koviti-19, le taua i Europa ma le mau fevaevea'iga.

E mafua ai ona faatau talanoaga logomalie, e pei o lena i Samoa i le miliona, saunoa mai nisi, auā e faatupu fiafia i le atunuu lautele. I Niu Sila nei ua talanoa i ni fa'aaliga fou o se sao o Niu Sila i atina'e taule vateatea e o e nonofo ai. E faatupu fiafia.

E taua lena vaiaso i aso faailogaina, o lena o le fiafia, o lena o le tete'e atu i faiga faailogalanu ma lona faamutaina, o lena o fatugasolo, o lena o le down syndrome i e maua ai, o lena o vaomatua, o lena o le vai ma lona taua. Ma isi mataupu.

E le finauina, fiafia o le ki i se faatinoga lelei o soo se tautua, ae iai foi taimi e moomia ai le onosa'i ma le lava papale. E le susua pea alia ma tufu. E iai aso e pe ai le paipa. E moomia sina ositaulaga.

Fiafia o se lagona e ao ona lagonaina faatasi, ae le na o se to'atasi poo se to'alua, i le mafatiaga o isi.

## O le a sou taofi?

## O a ni auala e faatupu fiafia i fanau i lena vaiaso o le le manino?

**O nisi nei o taofi mai le mamalu o le aufaitau e aofia ai tali mai nisi o su'esu'ega faavaomalo.**

- **Talanoa ma i latou.**

E autasi e na siligia i lena auala. E leai se isi lava auala ua iloa lona aoga e pei o lena. E le gata e mafai ona fai ae leai se tupe e alu ai. I le a'oga e avanoa le faia'oga e laga se talanoaga i soo se mataupu e faamalosia ai le fanau. O le avanoa foi e tali ai ni fesili a i latou i le tulaga le manino o le taimi, i se si'uleo mautinoa ma talitonoa. Aua lava ne'i avatua se fe'au o le le mautinoa ma le taufaafefe, saunoa mai nisi. I le fale e faapena foi. Tele o aiga Samoa e le masani ona talanoa matua ma fanau. A talanoa foi, na o ni fesili ma tali ae le o se talanoaga e feaasoa'i ai taofi ma lagona.

- **Faalogo ma matau toto'a**

E autasi su'esu'ega i le taua o le faalogo filemu i manatu o le fanau. I le faalogo toto'a a le faia'oga poo se tagata matua e maua ai lo latou lototele ma le mautinoaga e amana'ia i latou. I le na o le faalogo ma le matau toto'a e mafai ai e le tagata matua ona iloa atu mea i le loto ma le mafaufau e ala i upu. A iloa, ona mafai lea ona fesoasoani atu i o latou tiga ma mafatiaga. O lena tomiai e ao ona maua e matua uma. Ua masani i le fai o le faatonuga ae leai se taimi e avatu ai le faalogo i so latou leo poo se lagona faaali. Ua iloa le eseese i fanau e maua'a fesoota'iga ma matua, o i latou foi na e faigofie ona talanoa atu i o latou matua ma faia'oga i o latou faafitauli. Peita'i o se tomiai e tatau ona atia'e faatasi.

- **Faatumu le taimi**

A o feagai le fanau ma lagona o le le mautonu, e moomia ona faatumu le taimi. Pei lava o le muagagana anamua, o lima e le gaoioi e faaoga e le tiapolo. Iai nisi su'esu'ega ma a latou lisi o mea e faatumu ai le taimi. E anoanoa'i, i ni asiasiga e fai i le vao poo le gataifale, e fau ma soloi a'oga e maua ai. E moomia e fanau le 'ea i fafo, lena vaaiga fou e maua i le laufanua ma faatupu fiafia. Faapena foi i potua'oga, i galuega faatino, tele taaloga lelei e lu'i ai le mafaufau. O faitauga tusi, tusiga solo e tosina ai i latou e o mai pea i le a'oga. Ae le ta'ua taaloga aua o le mausa lea o le to'atele. Ae a pese ma siva ma tauloto.

- **O oe le auala**

Pei lava ona malie i le faalogo le upu a le alii faia'oga Initia, Mahatma Gandhi, ave a oe ma a'u o lena suiga e te fia vaai i ai i lena lalolagi. E leai se auala sili e tusa ma le faia'oga lava ia. O le agavaa aupito moomia i se faia'oga lelei e pei ona saunoa Tupua, o le alofa i le fanau e le faailoga-esea se isi. O le faia'oga le faa'oa'o sili, a fiafia e faitau tusi, e faapena foi ona soo laiti, a foliga fiafia i taimi uma, e faapena foi ona soo laiti. A usupo mai i le falea'oga, e faapena foi ona soo laiti. E le sese lena auala ae sa'o i taimi uma. E mautinoa o le auala sili lea.

## Fiafia o le ki i se faatinoga lelei o le tautua

E le tele ni malo pei o Amerika. I lona faavae o loo puipui ai le aia tatau a ona tagata i le ola fiafia. E avanoa le tagata e saili lona fiafia, atagia ai le maua o le faamamafa i le sa'olotoga ma le ola maloloina i lona atoaga o le tagata.

A ua tatou iloa foi lona faigata ona saili ma taofi i nei aso ona o le mau lu'itau ogaoga. E faapefea ona tupu se fiafia pe afai ua lofia le faasoa ona o le taugata o le tau o oloa, o pili o le fanau, penisini, o faalavelave o aiga ma le lisi faaniutu, e fua i le totogi? Ma e le mategata se lagona o le silia i le onosefulu afe faia'oga i le vaiaso ua te'a.

O le tala malamalama, a lelei aso ua oso i luga le fua o le fiafia, a leaga, ua alu ifo faasaga i le ta'ele o Seoli. E le o sologa malie le tulaga o mea i Aotearoa nei, nuu o le suasusu ma le meli, ma i le lotoifale o a'oga, ua amata le tete'e a faia'oga i o latou totogi. O le upu mai le iuni, e fa'aauau lea faiga se'ia to mai se tali lelei mai le malo.

O lea foi e feagai le atunuu ma le ta ogaoga a se

## Ne'i Mea Ane ua Galo

**Atoa ai le 120 tausaga talu ona taunuu alii Saina i Samoa**



UA ATOA AI LE 120 tausaga talu ona taunuu alii mai Saina i laufanua o Samoa. Taunuu i le aso 28 i se faigamalaga umi, faitau aso i luga o le vasa, 6,426 maila na laasia, ma e le tauilo o se si'osi'omaga e matuā ese mai i lo latou, mulimuli ane faamaonia ni masaloga, e le faigofie. Taimi o pulega a Siamani, e molimau le talafaasolo i le lasi o lu'itau sa feagai ma i latou. E tulaga muamua le faailogalanu, amatamea pulega malo, aemaise Niu Sila, ma faama'ite se talanoaga faailogalanu i Samoa e faatatau ia i latou. O lena talanoaga ua tauau e fai ifo, ui ina lagonaina pea i nisi o taimi i le upu faatalasua.

O se tasi o talanoaga e faaleiloga lona asiasia i su'esu'ega o lena i le faapogai o le tuuvaa ese o alii Saina mo galuega faavaitaimi i itu e fia o le lalolagi. O le tali, e mafua i le mativa ma le puleesea. Saina i lea vaitaimi o se malo mativa ma le osi to'ilalo i malo malolosi. O le auina atu o ana talavou o le tali lea i aiga ma le malo i o latou mana'o i ia taimi faigata. Ae sili ona tali ai mana'oga o malo malolosi ma a latou pisinisi.

Se'ia tula'i mai Mao ma faapea ona suia le alafua mo Saina, sau ai ia Deng Xiaoping ma ana fuata'iga faaletamoaiga, lea ua molimau le lalolagi. Ua le toe 'aisi Saina a o se malo talimana'o i malo tauatia'e—e o'o lava i malo lelei atina'e. Ua le toe auina atu ni ana tamafanau e pologa i le tausiga o faato'aga a isi nuu, auā ua lava ma totoe galuega e tua i ai.

A tatou asiasi i le laufatu o molimau a aiga e tupuga mai i nisi o i latou, e ma'eu. O se vaega itiiti o i latou na nonofo ma atia'e malie a latou pisinisi ma alu a'i le taimi tula'i a'e o ni suafa taualoa i Apia i le li'o o faiga pisinisi.

## O LE ASO I LOU TALA FAASOLOPITO

SAMOA HISTORY

"Ne'i mea ane ua galu"

APIA 1830

Copyright Reserved LPSTavita

### ~ MATI 19-31 ~

19

1927 Faavae le Samoa League, alu a'i ta'u o le Mau

1973 Toe filifilia Fiamē Mataafa ma palemia

1985 Tumalo HRPP, fa'auau Tofilau palemia

1999 Tu'umalo Tofilau Eti Alesana

20

1970 Goto le Betty Lou gatai o Apolima, maliu ai se alii matua ma se pepe

2020 Folafofa tulaga faafuase'i i le o'o mai o le verusi korona poo le Koviti-19

21

1844 Pasia le faavaeina lotoa a'oga Malua

1928 Amata pulega malo a William Nosworthy

22

1899 Sunui nuu afua mai i Faleata e aulia

Satapuala; Laulii i Fagaloa; Safotulafai i Savaii e fitafita a le malo

23

1899 Toe faanofo Tanumafili i le tupu e

konesula e to'atolu

1947 Aso soifua, alii faafiafia Jerome Grey

24

1880 Lagolago e konesula to'atolu Talavou

1970 Filifilia Tupua Tamasese Lealofi IV ma

palemia, 25 i le 20 a Mata'afa. Magele Ate

fofoga fetalai, Faimaala sui fofoga fetalai

1976 Filifilia Tupuola Efi ma palemia, Leota

Ituau Ale fofoga fetalai

2018 Tuumalo Laauli Alan Grey

25

1883 Osofa'i se matagi malosi gogoto ai ni

vaa sa tuta i Apia maliliu ni tagata

26

2003 Tuumalo Tauese PF Sunia

27

1942 Taunuu le USS President Garfield ma le

vaega'au 7 Marini Meleke

1948 Tuumalo Mata'afa Fiamē Mulinuu 1

2003 Ueligitone NS. Tauaao atu le talosaga

a tagata Samoa i le palemene mo le suia o le

tulafono Samoa i aia tatau faatagatanuu

28

1903 Taunuu i Apia le ulua'i pasese o alii

Saina mai Swatow mo galuega leipa

1979 Toe filifilia Tupuola Efi palemia, 24 i le

23 a Vaai Kolone

29

1899 A'ea ma nofoia e 'au a le malo le aai

o Magiagi

30

2005 Malo David Tua ia Talmadge Griffis T10

31

2006 Faiga palota. Malo HRPP maua le 30

o nofoa e 49

Ta'utino se pa'aga a lenei puletini, e silia i le 'afa o le tamaoaiga o pisinisi i Apia o loo umia e i latou, e gafa mai i alii mai Saina. O se ausiga iloga lea i totonu o le na o se seneturi ma ona tupu tausaga.

Faapefea? Faapea mai nisi a tatou tagata su'esu'e, e mafua i le agaga tauivi, to'aga ma le faalogologotiga, aemaise o le fegalegalea'i, fesoasoani le tasi i le tasi. O se tasi o talanoaga logomalie mai lea uiga fa'aali, e iai le faatusa i pa'a, faatusatusa ai Samoa ma Saina. Ma isi lava talanoaga lelei, e iai le taua o le teu o tupe,

iloga ona faasoasoa tatau, le taua o le ola atina'e, galulue fe'oe'oea'i. E o'o lava i tala o mea'ai ma kuka, le aoga o kipasi ma fualaau faisua i se tausiga maloloina, o alii Saina na mua'i faama'ite.

I totonu o le 120 tausaga, ua mafai ai e le malo o Saina ona sui le talanoaga, mai lena o le mativa i le tamaoaiga, avea ai lana 'aufaigaluega na auina atu i Samoa, ma se faata'ita'iga iloga.

I le toe tepa i tua, e foliga ua toe so'oa lea talanoaga i se milosaga fou, i le aga'i atu o tamafanau a Samoa e faia lea i nuu ese. Pei ona ulua'i faia e alii mai Saina, 120 tausaga tuana'i.



Ata: I luga a'e, o alii Saina o loo tapena taga koko mo le avatua i maketi i Siamani ma Europa, i le vaaiga a le ovasia Siamani. I le ata leni e molimau ai i le itula na to'ai ai i fanua o Samoa i latou mai Swatow, nisi o i latou na nonofo e lei toe fo'i.

**UILI FAU UPU**

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Ta’u mai ni uiga se lua o le upu *mua* i le 1. Samoa 2. Igilisi:

\_\_\_\_\_

\_\_\_\_\_

2. Sa’ili ni upu se 5 e faai’u i le fasiupu *mau*

\_\_\_\_\_


\_\_\_\_\_

3. Su’e se upu e 9 mata’itusi ma tusi sona fa’amatalaga:

\_\_\_\_\_

\_\_\_\_\_

\_\_\_\_\_



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

*Lelei atoa* = 12 upu

*Lelei tele* = 8 upu

*Lelei* = 6 upu

\_\_\_\_\_


\_\_\_\_\_

\_\_\_\_\_

**PASO I GAGANA E LUA**

Faatumu i upu/igoa Peretania e soa ma upu Samoa.

Fill crossword with English equivalents or as directed.



Faalava ~ Across

1 tatalo (6)

4 li, 'ata'ata (4)

8 a'au (4)

9 palemia talu ai Niu Sila (6)

11 mata'itusi faatafa (6)

12 tama'i (solofanua) (4)

14 alu (2)

15 'auvala'aulia (6)

19 aso filifilia (4)

22 i le (2)

24 Mose (5)

27 aunese (5)

28 faatino (3)

29 gaoi (nauna) (5)

30 Aikupito (5)

Lalo ~ Down

1 nofoaga tutu ai taavale (7)

2 tulaga masani, feoloolo (7)

3 Edward (faapuupuu) (2)

5 leitio (5)

6 tina o lou tina (5)

7 pine e iloa (3)

10 lisi (4)

12 pa'u o se fatu la'au (3)

13 upega (3)

16 all nations unite (3)

17 ave i le faamasinoga (3)

18 o le mea lea (2)

20 tuafafine o lou tamā (5)

21 tuli ese faamalosi (5)

23 o se fa'aaliga tusia (4)

24 feiloa'i (taimi ua te'a) (3)

25 va'ai (3)

26 Aso To'ona'i (faapuupuu) (3)

**SU'ESU'EGA: FAASOA LE FUA MA LE LA'AU E ONA**

1. PUATAUNOFO





2. ITALIA

3. FASA

4. FAU

5. GATAE

6. AUTE



Galuega fa'aopoopo:

- 1. E iai ni aoga o nei la'au ma o latou fua i le si'osi'omaga?
- 2. E iai ni upu a Samoa e fai i ai?
- 3. O a ni faailoga e tulagaese ai?
- 4. O a o latou igoa faa-Peretania?



**SUDOKU: Faatonuga:**

Fa'atumu pusa numeraga (tama'i sikuea) i fuainumera 1 i le 9. Ia uma ane le galuega ua maua atulaina ta'itasi (tu, fa'alava) o iai le 1 i le 9. E tofua le atulaina ma lona fa'atulagaga e ese mai le isi.

**SUDOKU ~ TAALOGA I NUMERA**  
(sudoku.com)

6								2
7		9		3	6			
		5	4	8			9	
8	3							7
1	4			6	5	9	2	8
9	5		8	1	7	6	3	
			6	7		2		5
5						4	6	
		8			4			

TA'ALOGA FOU ATIA'E AI TOMAI I GAGANA E LUA:

# Ta'aloga fou mo tamaiti

## PI the Builder

- Rules:
1. Build as many English words as possible, start with four letter words.
  2. Every word you build must include the central letter (the Alpha letter).
  3. Each letter is used only once, except for the central letter, when it is needed in a five letter construction or more.
  4. The class or groups can play this game as a competition. 1 point for each four letter word, 2 for each five letter word, 3 for each six letter word.

Four letter words \_\_\_\_\_

Five letter words \_\_\_\_\_

Six letter words \_\_\_\_\_

Seven letter words \_\_\_\_\_

## O le Paso Numera

1		2		3		4		5
		6						
7						8	9	
			10		11			
12	13				14			
			15	16				
17		18				19		20
				21				
22						23		

### NUMERACY PUZZLE (PASO NUMERA)

NAME: \_\_\_\_\_

DATE: \_\_\_\_\_

ACROSS ~ FAALAVA

1. 353—126
4. 46 x 6
6. 26 + 330 + 12
7. 724—322
8. 1265—404
10. 400 + 467
12. 3 DOWN—16 DOWN
14. 2004—876
15. 133 + 208 + 428
17. 1652—809
19. 26 x 9
21. 646—215
22. 1762—1430
23. 19 ACROSS + 22 ACROSS

DOWN ~ LALO

1. 526—322
2. 519 + 213
3. 5673 + 2163
4. 597—349
5. 12 ACROSS—15 ACROSS
9. 946—324
10. 1200—393
11. 436 + 283
13. 172 x 2
16. 2386 + 1420 + 2640
17. 1257—444
18. 161 x 2
19. 430—215
20. 162 + 162 + 162

## SOLO A TALOSAGA TOLOVAE

### Noga o le po



Faalogo !  
 Afai e te matuā faalogo  
 I le toto'a  
 O le pogisa i totonu  
 Ta te lagona atu  
 Le tata a le la'au i le papa  
 Le tauaso iloitino  
 O loo saili ni vaiania i le po  
 Lo ta papa  
 E le mavetea  
 I le so'oga.

Faalogo !  
 Afai ta te faalogo  
 I le pati a le po  
 Le oteote a le mose  
 E le si'i pe pa'u  
 I le ulufanua a le taimi  
 Ta te faalogoina le tu'itu'i  
 O noga faaleotagi anamua  
 E faamatala  
 O ta popolega  
 Na aumaia i ta'ua  
 I lenei mamao.  
 Faalogo i le pouliuli  
 Tago i le filemutoto'a  
 E maua i ai moge  
 Matala  
 I le aso tuana'i  
 Faapei o le po  
 Na te fa'aalia se mea  
 I le leo pa'a'a o o ta mafaufauga  
 Le vevesi vale  
 O manatu faaleaso  
 Lagona atu le gaogao aato  
 Pa'i i le tumu osaosa  
 E feiloa'i ai i alofilima o le mafaufau  
 Le fesoua'iga  
 O loo i totonu o i tatou uma;  
 Le pouliuli pato'i  
 Na te faasoesa  
 Se'ia sola ese le filemu ma le  
 Mafaufau e le toe foi.

Faalogo !  
 Faalogo foi  
 I le po  
 A o ti'a'a o ta ponaivi  
 Ma'a'a o ta faamoemoega.

Faalogo !  
 Faalogo i le toa tauaso  
 O loo ia sufi le pogisa  
 Ina ne'i olopala  
 E le po  
 E pei o se 'alā telē ua pa'u ifo  
 Ua matala  
 I le lagi'i a le se'u.

Faalogo !  
 Faalogo tele  
 I le amataga  
 I le po  
 Faalogo  
 Faalogo tele

Faalogo Faalogo  
 Pa'i atu i le filemutoto'a i totonu o i ta'ua.



E FAAILOGA LE VAIASO O LE SOLO I LE LALOLAGI: LPSL TAVITA

# O se va'ai puupuu i le solo faa-Samoa ma lona atina'e mai

TALU AI O LE VAIASO LENEI o le faaiologaina e le lalolagi o le faiva o fatugasolo, o lea ua manatu ai e fai sina faasoa i le mataupu.

O le tala o le solo faa-Samoa e leai ni su'esu'ega tele ua faia i ai, afai foi o iai atonu e tasi pe lua. Ui i lea, e feoloolo ni motuga'afa o taofi ua faia faatatauina i ai.

O misionare na latou ulua'i faamauina solo iloga a Samoa, faapea alii su'esu'e Siamani e iai Kalama. Ua tatou avanoa ai e faitau ma 'ae'aea nei galuega taua a o tatou tua'a ua fai i lagi le folauga. Lata mai le alii o Richard Moyle na ia mafai ona faamau nisi o nei solo i mea pu'eleo e aofia ai pese ma fagogo.

## SAMOA ANAMUA

O le solo faa-Samoa sa teuloto ma tuufogoga mai i auga tupulaga. Faato'a faamau i upu nisi o na solo e misionare ma tatou avanoa ai e faitau ma su'esu'e atili o latou fausaga ma uiga.

E foliga e leai se fausaga se tasi pe lua o le solo, mai le taunuu o misionare e aulia mai le faaiuga o le 19 seneturi. E iloa lea i foliga o solo sa faamauina e misionare. O nisi solo e pupuu a o isi e gafagafa e pei o le solo o le Va. Ae tutusa fausaga o solo ma pese i le leotasi o silapela mulimuli o laina. Peita'i e iai foi solo e le faapena.

Fai mai Pratt (Misi Parate) e leai se fua o le solo faa-Samoa anamua poo lea e ta'u o le metre, ma e iloga Samoa i lea faiga sa'oloto. Ae a faalogologo lelei i pese e atagia mai ai se fuataga o le pā'o e usu faatatau i ai le pese. Auā o pese sa fatu faatatau i le po ma le pati i faafiatiaga, poo le aloga o vaa poo le faatinoga o ni fe'au.

E le ese faamoemoega i tua o fatugasolo a tua'a anamua ma i tatou foi i nei aso. Muamua, e faamau se fe'au taua mo e luā, lua, e pine se mea sa tupu ina ne'i galo. O le solo o le va o loo aofa'ia ai le tala o le mau a Samoa i le foafoaga, molimau le 'aumatutua. O le tele foi o solo e faatatau i mataupu o le olaga masani, e faaupu lagona o le fiafia, faanoanoa, faatuatua, faagaetia, alofa, le fia tauimasui. O nisi o solo e foliga e faigofie ae lavelave o latou faatatau. E ta'u mai ai le loloto o le asiasiga a le mafaufau Samoa poo le sailiga tofa i tulu'iga o le fiafia poo faafitauli. E le ese ma na o fatusolo o isi nuu ma tagata. E iai lenei solo anamua, faamauina e Parate:


**Tinio, tinio, tini o!**

**Maumau o mea faamalama,**

**A tia'i e le malo.**

E ta'u mai e le solo le tulaga o le suiga i le olaga talu ona taunuu le lotu fou ma lana faamata'u i fiafiaga sa masani ai. E iai mea o le a lafoa'i, e pei o tu o le afi i tapua'iga ma poula ma evaga. E le pine e tia'i e le lotu fou, o le itu malo i le tausinioga i le pule. O le solo lenei e sa'afi ai i ni mea taua a leiloa atu. Faatusatusa i le isi solo lausilafia a Afoafouvale, pei ona faamatala e Tupua i lana tusi, la faagaganaina oe e le Atua Fetala. Ua miti le fatusolo i le mea sa iai, ae maumau fua le momoo ona o le tulaga moni ua iai. E mafai ona faatusatusa le solo lenei ma nisi a tatou solo faaneionapo, ma iloa ai le malosi o le lagona o le misia o mea taua pe a tula'i mai suiga.

O i latou e pei o Tupua e malosi le taofi i le sao o solo anamua i le faamatalaina o le talafaasolo o



FAATAMĀ: Maualaivao Albert Wendt, fatusolo fa'aalologia a Samoa. Thomas Powell (Misi Paueli), aupito tele ana pese lotu na tusi o loo pepese ai pea Samoa.

Samoa, auā o loo ta'u ai le mau a Samoa i le foafoaga, le Atua ma le tagata. O le solo o le va, o se tasi o solo ta'u so'o e le 'ausu'esu'e.

O Fanaafi sa ia faaofi le utuvagana e mulita'ia lona o le gagana Peretania, ma ua tatou iloa ai le tamaoaiga o i latou sa faia lea faiva. Talanoa i le atalilo, ua leva ona nofoilo a tatou fatuupu i asoani, ma le vao auala e atia'e ai le gagana. Talanoa foi Tupua i se gagana e le tuusa'o ae faatatau, e molia i tupua ma ata e taumate, e le faigofie ona mate'ia e le tagata ese sona faauigaga. Tele a tatou upu e tutasi ma uiga lasi, lona uiga, na o Samoa e maua ai.

I le tusi a Tupua sa ta'ua, o loo ia vaevaea mai ai nisi o faata'ita'iga o fatugasolo, e molimau i le 'oa o le gagana e tutasi mo le lagona Samoa lava ia. O se lagona e ufiufi ma afeifei, ma e tataua ona asiasi i ai ma le faaeteete i le faavaa o lea vaogagana ina ia manino le fe'au.

## TALU MAI LE TUTO'ATASI

Afua mai i le Tuto'atasi ua sui foi aga o fatugasolo faa-Samoa. Mo Samoa, o le silapasi a Niu Sila ma le laufatu faa-Peretania sa ta'ita'itama. Na tatou feiloa'i atu ai i le solo faa-Peretania ma lona tala'aga, mai fatuga tuai o mita e aulia mai na e tuusaunoo le faiga. E le tauilo, o le alii fatusolo ia Albert Wendt sa faama'ite i le atina'e o lenei auala mo Samoa. Talu ai o le gagana Peretania lana gagana tusitusi, na faapea ona ta'a'ina ai le to'atele e fatufatu foi i lea gagana. Alu a'i ua ta'a'ina ai foi le galuega fatusolo mo sina vaega e fiafia e fatufatu i le gagana Samoa.

Ua lagona teisi se leo o Samoa i le taleni o le fatusolo i le gagana Peretania, faafetai i le sogasogā o Albert Wendt, ma nisi na ia faafaiilelea i le Kolisi o Samoa. Peita'i ua le faapena lona atina'e i la tatou gagana. Moni, e le misi i lau faalogo le leo ma le lagona Samoa i totonu o le gagana Peretania, peita'i na o latou e iloa le gagana Peretania e avanoa i ai. Ae mo le to'atele o Samoa, latou te le o maua sea faamanuiaga.

I fatugasolo faaneionapo, e foliga e lua falea'oga. Muamua, o lona e ama i le gagana fa'aata ae matau i le gagana ta'utino, tuusa'o. E foliga e ave le faataua i le fe'au, la lea o upu ua na o ni avefe'au e faailo manino le sini—o le fe'au e fia momoli. A malie ma onomea upu, o se ponesi lea mo le tagata faitau.

O le falea'oga lona lua o lona e faataua upu pe faapea foi e matele i le gagana fa'aata. Peita'i e iai foi le taofi e leai se fausaga e atoatoa pe 100 pasene le talimana'o. E ta'u mai lava e le solo ia lona lelei ma le moomia. O le solo na tusia e le alii

fusu logologoā o Muhammad Ali e na o le lua upu (Me We). O loo talanoa ai pea le lalolagi. O le solo ta'uta'ua a lapani e tolu lava laina.

La lea o le fesili poo le fea fausaga e lelei, poo lona o le gagana tuusa'o poo le gagana faatatau/fa'aata, e le tali gofie? O le popolega mo nisi, o le le manino o le fe'au mo le fanau pe a mafuli le faamamafa i upu o le gagana mai anamua.

E faamalosi i tauvaga tautalaga a le Polyfest ma le FAGASA le nofoilo o fanau i a latou upu e fa'aoga. O lona uiga, e tataua ona malamalama foi i mafua'aga o alagaupu o loo fa'aoga. Afai o le fe'au o le autu, a o upu o teuga, ona moni lea le faamanatu i le taupou e mafa teuga ae faaletonu le siva. Poo le lauga e tele upu ae leai se fe'au aoga mo le 'aufaafogoga.

E le pine e faapena foi le solo, e mana'omia le paleni, ina ne'i mafa teuga ae galo le mea taua, o le fe'au. Ina ne'i mafuli foi i le fe'au ae galo le sao a teuga. E autasi le lalolagi, e taua teuga i le solo lava ia, la lea e fili na o upu aupito lelei. Ma lenei, e sa'oloto le fatusolo i lana fua. Tusa pe na o le lua upu ua lava lelei, e pei ona faia e Muhammad Ali.

## AGA I LUMA

Ona o le tosina o le to'atele i le pese i nei tupulaga, ua tauau e mate ai le mumū a le solo. Ae manatu foi nisi o le solo o le pese lava lea. E mafua i le taofi o le solo e pei o le suavai, e le tagatasi lona tino mai. O le solo e pese, e tatalo, e tagi, e siva, e gagana mai i se faatagata poo se tala e faitau, i se ata tusi matagofie, i le gase o le to'ulu o lau, le uisa a le savili o ni solo o loo gaoioi. Lona uiga e le tau faamatalaina i ni upu, ae lagonaina e sulu o le tino.

O loo tatou faia le faiva o le fatusolo i aso uma. Tau a ina tatou fifilemu ma faalogo toto'a teisi, tatou te lagona atu ai lona si'uleo i soo se pa'ō malie mai fafo i le fanua poo totonu i le lotu. I nisi taimi e te le leiloa o loo e fatuina se solo. Faata'ita'iga, o se fe'au sa lafo e se tina i lona to'alua i le telefoni (tesi):

**Mase. sau vave. esikegi kaavale.**

A mautu sea mautinoaga, ona tatou faato'ā lagona lea lona matagofie ma fiafia i ai.

Ua iloa le aogā o le solo i le molita'ia o lagona patino o fanau. E una'ia ai tomali o le tomanatu loloto. Mai le tusiga o se solo faigofie e faavae ai tomali e tusi ai se tala ma alu a'i tusi se tusi. La lea o le solo o le iunite faavae e tu ai i luga se atigā tomali lelei i tusigatala. Tatou te faamanatu i le fanau le si'omia o i latou i faata'ita'iga sili, i le Tusi Paia i salamo a Tavita, o ni solo anamua, molia mai i na tausaga e tele ma toe faaupuina mai i la tatou lava gagana. Lona uiga o loo tatou nonofo ma le tusisolo aupito ta'uta'ua, i le Tusi Paia Samoa e maua e aiga uma. E mafai fo'i ona tatou faia o lea ia tatou solo tuai, toe molia mai le fe'au i le gagana e malamalama ai le fanau.


Mulia'i, tatou te manatua ma le lotu faafetai a tatou fatusolo i lenei vaiaso o le solo. Mai ia te ia poo latou na fatuina le Solo o le Va, o Afoafouvale le aloalii fatuupu, ma le to'atele ua le māua suafa. Aulia mai lenei tupulaga i nisi o suafa lausilafia, o loo tautua i le solo i le gagana Samoa ma le faa-Peretania foi. O a tatou fatupese, aofia ai ma alii misionare sa tusia a tatou pese o le lotu, ua iloga totoano o latou sao.

Ona o le faiva e fai to'atasi i le pa'usisi o le tagata lava ia, e mafua ai ona tau le iloa atu i latou, ae le siligia so latou sao, mo Samoa ma i tatou uma.

Ua iloa le faiva o le osiosiga o le upu o se misiterio ofoofogia, e mafua ai ona taumate pe se a le uiga, pei o le tala e fai i le tupua e le gase.

ILOILOGA O SE TUSI: LPSL TAVITA

## O se iloiloga o le tusi OLAGA FOU



Tusitala o le tusi OLAGA FOU. Pastor Tavale ma Alison Matai'a. O ulua'i tautai o le vaa Talavou mo Keriso i Samoa

O le tusi na 'u'u mai e le tina o le aiga, sa alu i le faletusi tau i ai, ma ta'aina lana vaai. O le ulutala e Samoa, o suafa o i la'ua na saunia le tusi e masani ai lana faalogo a o nofo i Samoa. Sa susu'e le tusi ma iloa ai nisi o ana uo a'oga i ata o loo iai. Ma tonu ai e ave i le fale e faitau ai.

Sa ta'aina foi la'u vaai ina ua o'o mai le tusi i le fale, ua tilotilo ma faaosofia ai se tomanatu, i nisi o uo mamae sa mafuta a o nofo ai i Samoa, o i latou o ni sui faamaoni o le YFC, i na tausaga a o laiti.

O le tusi OLAGA FOU e faalelotu lona 'auga ma le sini, e le o tagata faitau uma e fesoota'i i ai. Talu ai na saunia i le gagana Peretania, o lea foi le pogai ua le avanoa uma i ai le aufaitau, aemaise i latou e na o le Samoa le gagana faitau. Ae le suia ai le moni, o lenei tusi o se oloa na gaosia lava i laufanua o Samoa. O le tusi Samoa. Tainane le gagana o loo molia ai, ae lagona lelei atu le siuleo Samoa i manatu ma lagona fa'aalia.

O le tala lenei a Samoa i le faalapotopotoga Youth For Christ (Talavou mo Keriso), faavaeina i Samoa i le 1973, e atoa ai lona iupeli poo le 50 le matua i le tausaga lenei. Mo e sa fitaituga, o se taunuuga tausafia e ao ona patipatia. E leai foi nisi e sili le agavaa i lona saunia nai lo tusitala e to'alua, auā o la'ua sa afuamea ma faafailele le pepe, se'ia malosi ma avea ma tagata matua.

O le tala foi i se alii faia'oga ma lana malaga, tuua le atunuu mo a'oga i Niu Sila, o le faamoemoe e fo'i atu ma galue i le faiva faia'oga, mulimuli ane e tatau ona ulufale i le a'oga faafaifeau e tali le mana'o o lona tamā. Peita'i ane e le o le fuafuaga lea a le Atua mo ia. O lona vala'auina e ese foi.

O lana misiona, e toso le upega i le taulotoa'iga o le taulaga, i a'oga a le malo ma lotu o loo faapotopoto ai. I lena ogaeleele e aga'i uma i ai tama ma teine mai itumalo ta'itasi; o le faalupega, o ta'ita'i faaolioli a Samoa, e a'o'oga ai.

E mautinoa e leai se tama ma se teine a'oga i Apia i lea vaiata e le i faalogo, pe sāua i le vaai, le molimau a le YFC, avea ai nisi o ni soo faamaoni, a o isi foi na aiaina le faalogo ma le lagona. A tu ma toe tepa i tua i le mamao o le ala, 50 tausaga ua aulia mai, e molimau fua o le galuega lava ia.

O le faaofi atu o se auala fou i se laufanua lotu ua mautu faavae e le faigofie. O loo iai faifeau a nuu ta'itasi, o pulega mamalu a alii ma faipule. E iai foi a latou auala e pulea ma faatonutonu ai amioga a le fanau. La lea e le i faigofie le asaina o le gasū. O le faameo masani, O a foi na tala'iga o lea ua iai lotu? O le tasi o popolega fa'aalia mai matua ma nuu i lea taimi, o le tu ma le aga mai fafo—e foliga o se faapipii, pe mafua i aga o tapuaiga— e ono tosoa'iina ese ai fanau mai mafutaga. Ae pei ona molimau tusitala lava ia, sa fa'aalia lava le aao fesoasoani o le Alii, alu a'i ua faamalamalamaina le to'atele i le uiga o le savali.

E malie le faitau atu i molimau a se vaega o loo tova ai itulau o le tusi. Ui lava i pa puipui o le gagana, ae fai mai foi le Aposetolo, o outou o tusi. E lava le molimau a le amio e ta'u atu ai lena tala i le olaga fou, ma sui ai ni taofi o matua.

E oo lava i lu'itau masani o le olaga, i le tau faapaleni o tiute i le aiga, le galuega ma le vao mana'oga. E leai se folafolaga i le faigaluega a mea a tumu le utu faaleagaga ona tumu ai lea ma le atotupe e tautai ai le aiga. E pei ona molimau tusitala, e tele lu'itau o le malaga.

O fua o le galuega e molimau ai ana lava tamafanau, o nisi ua avea ma ta'ita'i i le malo, le lotu ma le lasi o tautua eseese, Samoa ma atunuu i fafo.

O i latou o molimau i le ta'utinoga, e le o le lotu a o le va o le tagata ma le Alii. Lena sootaga lalata a le tagata ma le Atua e muamua i mea uma. Olaga fou e le o se upu e avane ai, i le taofi o tusitala ma le 'aumolimau, o se suiga moni lava e tupu.

O se tusi saunia lelei lenei pe a matau atu i lona faaupuina, e ta'u mai sa tapena faapei o se fafine to'aga lenei fe'au. E le faigofie le tapenaga o se tusi, ma e faafetaia le ma'elegā o le alii faifeau ma le faletua, ua tatou avanoa ai i lenei talisuga matagofie. O se faamanatu foi lea a le tatou puletini, i le taua o le faamau o tala o galuega. Pe ana leai sea auala po ua tatou le avanoa foi i molimau a aposetolo i le Alii ma lana Tala Lelei.

I sona aotelega, e le pine le faafiafiaina o le aufaitau, faapitoa i latou sa asā le gasu. O le latou tala lea, o se tala e ao ona patipatia. Ma e le fesiligia le molimau mana a lenei tusi mo i latou uma o le a faitauina. E maua kopi o le tusi i faletusi a le malo. Faafetai.

### Tulimanu o Pola:

E muamua la'u faafetai i le Tamā i le lagi i lou soifua ma so'u malosi ua tatou fesilafa'i ai. Ua asoa le malologa sa fai ae faafetai ua toe maua so'u avanoa e fai ai foi se tautua e ala i le OLA Puletini A'oga. Ae alo maia.



A o faia le malologa sa maua pea fesoota'iga ma le aufaitau, ma o le tasi lea mataupu e lagaina pea, o totogi o faia'oga. E iai nisi e manatu o faia'oga e le faamalieina i tupe ua maua, ae e sese lea taofi. E mafai ona ou tolalau atu ni mafua'aga se 100 e lagolago ai. O le mea lea lau susuga Hipkins, alofa ane i ou tamā ma ou tina ua savavali i le ala ona ua tumu le fua o le le faatauina.

O le mataupu i le suiga o le auala e fai ai le faasoa le malo ou te lagolagoina. Ua loa le faa'augagase ma le tesile, e fua ai le seleni i le tulaga o le tamaoaiga o aiga ma sone a'oga. Mafua ai ona alu le teva'aga a aiga papalagi i sone na e maualuluga tesile. O atu ai foi sina vaega o tatou. Pau le mea ou te molimau i ai, e le faailogaina e le tesile le iuga o se tama ma se teine to'aga. E maua foi sikolasipi ma galuega lelei i a'oga o i sone o tesile maulalo. Ae lelei le suiga ua iai, pe ave ese ai le ila o upu taufaifai, afaina ai loto o nai fanau.

Polyfest, ou te faatusa i le niu tupu maualuga, mai se tama'i o'o. E sa'o nai matua na faali taofi, e taua le faasinomaga, e muamua ai le Atua e pei ona ta'utino le faavae a Samoa. E taua le siva ma le pese, ae manatu foi e faitau le Tusi na te faasino tatou i le manuia, pei ona faamanatu mai Tavale ma le faletua, i le tusi Olaga Fou. O si a'u uo faia'oga e lotu Aso Fitu e le avanoa, e oo foi i nai ona alo, ona o le lotu. Pe iai se fuafuaga a le pulega i lea vaega? Pe mafai ona fai se kulupu faapitoa a latou e tauva ai i se aso e le pa'u i le Aso Toona'i?

Sa ou tau ane i se su'esu'ega a se alii Sapani i le vai. Fai mai le mau a lenei alii atamai, o le vai e pei lava o le tagata, e ola ma e fai fo'i lona mafaufau. A e talanoa i ai e tali mai. O soo se matāua o le vai e masa'a, e te maua ai elemene o se mea e ola manava ma tino mai. Ua iai molimau faamaoni faasaaienisi o ni mamamu matagofie o le vai pe a liua ma 'aia. Ae o le mea e ofo ai, o lana mau i le sootaga o le upu ma le vai. Fai mai a e fa'aaogaina ni upu lelei ma faamalosi'au, e tino mai le vai i ni mamamu matagofie. O vai e tafe sa'oloto i le vao o na e maua ai le vai aupito lelei mo le tino. E le pei o vai paipa ua loka i faatanoa. Ua vave ona tu mai i lo'u mafaufau le talanoaga a le Alii ma le fafine Samaria, ofo atu ai e le Alii le vai ola e uma ai le fia inu. O le fesili, Pe liua le upu e avea ma vai? E pei lava e foliga mai faapena. E 75 pasene o tatou tino e fauina i le vai. Ae fai mai foi loane o le upu na fau ai mea uma. Upu ma le Vai? Iesu le vai ola? Tausi ana upu e te ola ai? Asu le ipu vai o le ola? Ia, taatia atu iina e te vaevaeina.

O lea ua aumai le tusiupu fou a le Oxford English ua faaopoopo i ai nisi o upu o le gagana Maori. Ou te faamalo i lea suiga, e lelei mo le faaolaolaina o le leo a tagata o le fanua. Pau le upu e faitau ai ma tatou o le 'tamaiti'. O lo'u popolega o le upu fou lea na ou te'i ai, o le 'chur' (chur bro). Pei se faatalofa 'Malo uso.' O le molimau lea, e tupu le gagana. O ai na iloa pe o le isi 5 tausaga, ua iai se isi a tatou upu mo le Talofa, pe a taunuu malo ona faapea lea, Obladi bro, ae tali mai malo, Oblada, Cowboy. Manuia.